

TEZAUUR LITURGIC
19 APRILIE

ACATISTUL
SF. CUVIOASE
MATRONA
NIKONOVA
DE LA
MOSCOVA



MOSCOVA, 2000



Акафист

святой праведной

Матроне Московской

Кондак 1

Избранная Духом Божиим от пелен младенческих, блаженная старице Матроно, слепоту и немощь телесную ко очищению духовному от Бога приявшая, даром прозрения и чудес обогатилася еси и венцем нетленным от Господа украсилася еси. Сего ради и мы благодарне венец похвальный приносим ти, вопиюще:

Радуйся, праведная мати Матроно,
теплая о нас к Богу молитвеннице.

Икос 1

Ангел во плоти явилася еси на земли, Матроно блаженная, исполняющи волю Божию. Аще рождество твое в слепоте телесней бысть, но Господь, умудряяй слепцы и любяй праведныя, просвети духовней очи твоей, да послужиши людем и дела Божия явятся чрез тебе. Мы же с любовью вопием ти таковая:

Ра́дуйся, от младе́нчества Бо́гом избра́нная;
ра́дуйся, благода́тию Ду́ха Свята́го от пеле́н
осене́нная.

Ра́дуйся, да́ром чуде́с измла́да обогаще́нная;
ра́дуйся, прему́дростию от Бо́га свы́ше
исполне́нная.

Ра́дуйся, мы́сленныма очима́ волю́ Бо́жию
прозира́ющая;
ра́дуйся, слепо́тствующи́х умо́м мудрецо́в ве́ка
сего́ посрамля́ющая.

Ра́дуйся, ду́ши заблуждши́я к Бо́гу приводя́щая;
ра́дуйся, ско́рби и печа́ли утоля́ющая.

Ра́дуйся, пра́ведная ма́ти Матро́но,
те́плая о нас к Бо́гу моли́твеннице.

Конда́к 2

Ви́дяще лю́дие и иере́й, егда́ крещаше́ ты,
блаже́нная, чу́дный столп о́блачный над главо́ю
твоёю и обоня́вше благоуха́ние ве́лие, дивля́хуся,
что́ убо сия́ отрокови́ца бу́дет, пою́ще
Бо́гу: Аллилу́ия.

И́кос 2

Ра́зум имѣя просвѣщенны́й, иере́й Бо́жий
Васи́лий позна́, я́ко крещáемая от него́ сосúд
благодáти Бо́жия есть, и ты, прáведная Матро́но,
отрокови́цу святу́ нарече́. От на́шего же усер́дия
приносим ти похвалы́ сия́:

Ра́дуйся, во святе́й купели́ благодáтию Свята́го
Ду́ха благоухáнная;

ра́дуйся, на пѣрсах твои́х крест запечатлѣнный
имевшая.

Ра́дуйся, моли́твеннице, от Бо́га людем
даровáнная;

ра́дуйся, свеще́ неугаси́мая, пред Го́сподем
сияющая́.

Ра́дуйся, да́ром чудотворѣния от Бо́га
просла́вленная на земли́

ра́дуйся, венце́м неувяда́емым от Го́спода
увенча́нная на Небеси́.

Ра́дуйся, ми́лости Бо́жия грѣшным
возвеща́ющая;

ра́дуйся, от исто́чника воды́ живы́я жа́ждущия
напая́ющая.

Ра́дуйся, пра́ведная ма́ти Матро́но,
те́плая о нас к Бо́гу моли́твеннице.

Конда́к 3

Си́лу Бо́жия благода́ти о́щуща́ющи, е́ще во
младе́нчестве су́щи, Матро́но блаже́нная, ко
ико́нам святы́м устремля́лася еси́ и чи́стым
се́рдцем и младе́нческими усты́ хвалу́ Бо́гу
возглаша́ла еси́: Аллилу́ия.

И́кос 3

Иму́щи от Бо́га дар прозре́ния изде́тска,
блаже́нная ма́ти, сокрове́нная се́рдце
приходя́щих к тебе́ ве́дущи и о́ным бу́дущая, я́ко
настоя́щая, сказа́ющи, мно́гия лю́ди на путь
благоче́стия направля́ла еси́. Те́мже
прославля́юще Бо́га, умудря́ющего слепцы́,
вопи́ем тебе́ си́це:

Ра́дуйся, ди́вная прови́дице;

ра́дуйся, сокрове́нных грехо́в обличи́тельнице.

Ра́дуйся, помраче́нных душе́ю пресве́тлая
наста́внице;

ра́дуйся, заблуждших ми́лостивая
путево́дительнице.

Ра́дуйся, звездо́, ве́рным путь указу́ющая;
ра́дуйся, свеще́, во тьме ве́ка сего́ светя́щая.

Ра́дуйся, еди́ному Бо́гу послужи́вшая;
ра́дуйся, ко́зни диа́вольския благода́тию Ду́ха
Свята́го попра́вшая.

Ра́дуйся, пра́ведная ма́ти Матро́но,
те́плая о нас к Бо́гу моли́твеннице.

Конда́к 4

Бу́ря недоуме́ния и смяте́ния о чуде́сах твои́х в
люде́х разве́яся, ма́ти блаже́нная, и ти́и,
вразуми́вшу их Го́споду, дивно́му во святы́х
Свои́х, просла́виша и восхва́лиша тя, Бо́гу же с
благодаре́нием воспéша: Аллилу́ия.

И́кос 4

Слы́шавше лю́дие, ма́ти Матро́но, я́ко по́мощь в
неду́зах душе́вных и телесных подае́ши,
прихожда́ху к тебе́ со упова́нием и, совет
благоприятен и исцеление получи́вше,
благодаря́ще Бо́га, воспева́ху тебе́:

Ра́дуйся, я́ко болéзнующих и стра́ждущих душе́ю
прие́млеши; ра́дуйся, я́ко мир душам скорбя́щим
да́руеши.

Ра́дуйся, в заблуждѣнних сущих
вразумительнице;

ра́дуйся, благочестія учительнице.

Ра́дуйся, печалей наших утолительнице;

ра́дуйся, в скорбех утешительнице.

Ра́дуйся, благая безсребренице;

ра́дуйся, недугов всяческих безмездная
врачевательнице.

Ра́дуйся, праведная мати Матроно,

теплая о нас к Богу молитвеннице.

Кондак 5

Боготечная звезда возсияла еси, мати блаженная
Матроно, во дни лихолетия во Отечествии
нашем, яко новая исповедница, иго Христова
дерзновенно и безбоязненно чрез все житие
пронесла еси и, благодатию Божиею укрепляема,
подавала еси недоумевающим вразумление,
страждущим ослабу, больным исцеление,
благодарственно зовущим Богу: Аллилуия.

Икос 5

Видевше мнози Россійстии людіе чудеса и
исцеления, Божиею благодатию от тебе

подаваема: хромым хождение, разслабленным и на одре лежащим исцеление, беснующимся духов злобы отгнание, устремившаяся к тебе, матери, яко к источнику неисчерпаемому, от негоже испивше обильно, умиленным сердцем возопиша тебе таковая:

Радуйся, на путь правый от младенчества призванная;

радуйся, праведнице, от Бога нам дарованная.

Радуйся, целительнице, недуги наша исцеляющая;

радуйся, в нуждах наших скоро помогающая.

Радуйся, душеполезными советы нас вразумляющая;

радуйся, недоумения наша скоро разрешающая.

Радуйся, духи нечистые от человек отгоняющая;

радуйся, от всякого зла молитвою твоею ограждающая.

Радуйся, праведная матери Матроно,
теплая о нас к Богу молитвеннице.

Кондак 6

Провозвѣстникъ святости и праведности житія твоего, блаженная мати, явися святыи и праведный отецъ Иоаннъ Кронштадтскій, егда узрѣ тя во храмѣ и наименова тя свою преѣмницу, таже и осмый столпъ Россіи. Все же, слышавше сие, прославиша Господа, возглашающе Ему песнь: Аллилуія.

Икос 6

Воссия молитвами твоими, мати Матроно, свет благодати Божия в сердцахъ не ведущихъ Бога и грехми многими прогневляющихъ Его. Тии же, видяще чудеса, тобою совершаемая, обращахуся ко Господу, ублажающе тя сице:

Радуйся, подвиги твоими Бога прославляющая;
радуйся, славу Божию намъ являющая.

Радуйся, неверныя на путь правый наставляющая;

радуйся, грехми оскверненныя молитвами твоими очищающая.

Радуйся, къ покаянію насъ призывающая;

радуйся, за вся благодарити Господа насъ вразумляющая.

Ра́дуйся, храм Бо́жий люби́ти нас науча́ющая;
ра́дуйся, во огра́ду церко́вную расточе́нная
о́вцы собира́ющая.

Ра́дуйся, пра́ведная ма́ти Матро́но,
те́плая о нас к Бо́гу моли́твеннице.

Конда́к 7

Хотя́щи Пресвяту́ю Влады́чицу на́шу Богоро́дицу
достойно ублажи́ти, ма́ти Матро́но, повеле́ла еси́
лю́дем написа́ти всечестный́ о́браз Ея́,
Взыска́ние поги́бших имену́емый, и в хра́ме
Бо́жием ве́си твоея́ водвори́ти, да вси,
взира́юще на све́тлый лик Пречи́стья, со
умиле́нием восхва́лят Ю, Го́споду же
возопи́ют: Аллилу́ия.

И́кос 7

Но́вую тя засту́пницу, моли́твенницу и
ходатаи́цу к Бо́гу дарова́ Госпо́дь в го́дину
тя́жкую лю́дем Росси́йским, мно́зи бо отпада́ху
от Святы́я Це́ркве, ты же, ма́ти, маловер́ныя и
заблуждши́я наставля́ла еси́ словом и де́лом,
явля́ющи дивна́я чудеса́ Бо́жия. Те́мже
воспева́ем ти си́це:

Ра́дуйся, страны́ наша́я Росси́йския неусы́пная
печа́льнице;

ра́дуйся, спасе́ния на́шего хода́таице.

Ра́дуйся, Бо́га, Судии́ пра́веднаго,
умило́стивительнице;

ра́дуйся, недужных и оби́димых
покровительнице.

Ра́дуйся, немощных и безнаде́жных помо́щнице;

ра́дуйся, проти́ву духо́в зло́бы непреста́нная
воительнице.

Ра́дуйся, я́ко трепе́щут тя кня́зи бесо́встии;

ра́дуйся, я́ко ра́дуются о тебе́ А́нгели и
челове́цы.

Ра́дуйся, пра́ведная ма́ти Ма́троно,

те́плая о нас к Бо́гу моли́твеннице.

Конда́к 8

Стра́нно малове́рным и неразу́мным бысть, ка́ко
слепорожде́нная ви́дети и ве́дети мо́жет не
то́чию настоя́щая, но и бу́дущая, не ве́дяху бо
си́лы Бо́жия, в немо́щи челове́честей
соверша́емья. Мы же, блаже́нная ма́ти,

премудрость Божию, в тебе явленную, зряще,
вопием Богу: Аллилуия.

Икос 8

Всяческия досаждения и обиды, изгнания и
укорения претерпела еси, блаженная мати, не
сетующи о сем, но за вся благодарящи Бога. Сим
же и нас научаеши терпеливно нести крест
свой, тебе же благохвалити тако:

Радуйся, в молитве непрестанно пребывавшая;
радуйся, духов злобы постом и молитвою
отгнавшая.

Радуйся, мир благодатный стяжавшая;

радуйся, любовью твоею многия окрест тебе
спасавшая.

Радуйся, житием твоим изрядно людем
послужившая;

радуйся, и по кончине твоей людем непрестанно
помогающая.

Радуйся, и ныне нашим прошением тепле
внимающая;

радуйся, уповающих на помощь твою не
оставляющая.

Ра́дуйся, пра́ведная ма́ти Ма́троно,
те́плая о нас к Бо́гу моли́твеннице.

Конда́к 9

Вся́кия ско́рби и боле́зни а́ще и претерпе́ла еси́,
ма́ти Ма́троно, непреста́нно веду́щи брань с
си́лами тьмы, облича́ющи ко́зни и кова́рства их
и изгоня́ющи бе́сы от одержи́мых, оба́че до
кончи́ны дний твои́х помога́ла еси́ стра́ждущим,
неду́гующим и скорбя́щим, при́сно пою́щи
Бо́гу: Аллилу́ия.

И́кос 9

Ветии́ многовеща́ннии не возмо́гут досто́йно
просла́вити свято́е жити́е твоё и чуде́са, си́лою
Бо́жиею тобо́ю твори́мая, предивная ста́рице.
Мы же, хотя́ще псаломски хвалити́ Бо́га во
святы́х Его́ и подви́заемии серде́чною любóвию,
дерза́ем пе́ти тебе́ тако́вая:

Ра́дуйся, у́зкий путь и те́сная врата́ избравшая;
ра́дуйся, добродете́льми мно́гими просия́вшая.

Ра́дуйся, вся тле́нная в житии́ твоём отвёргшая;
ра́дуйся, смире́нием, я́ко венце́м драги́м,
украше́нная.

Ра́дуйся, евангелски, яко пти́ца небесная, на
земли́ пожившая;

ра́дуйся, Сы́ну Бо́жию, не имевшему, где главу́
подклонити, последовавшая.

Ра́дуйся, ны́не во обителях райских веселя́щаяся;

ра́дуйся, и нас грешных, моля́щихся тебе́,
милостию твоею́ не оставляющая.

Ра́дуйся, праведная ма́ти Ма́троно,
тепла́я о нас к Бо́гу моли́твеннице.

Кондак 10

Спасти́ хотя́щи мно́гия лю́ди от страда́ний
телесных и душе́вных неду́г, всено́щно
пребыва́ла еси́, праведнице Бо́жия, в моли́тве,
прося́щи им по́мощи и укрепле́ния от Го́спода
нашего́ Иису́са Христа́, пою́щи Ему́: Аллилу́ия.

Икос 10

Стена́ и покровъ́ была́ еси́ во дни жити́я твоего́,
блаже́нная ма́ти, всем к тебе́ прибега́ющим, и по
сме́рти не престае́ши ходата́йствовать пред
Бо́гом о лю́дех, с ве́рою притека́ющих ко гробу́
твоему́. Те́мже у́бо услы́ши ны́не и нас, грешных,
скорбьми́, болезнью́ми и мно́гими печа́льми

одержимых, и потщися на по́мощь тво́ими
моли́твами всем к тебе́ вопи́ющим:

Ра́дуйся, оби́димых ско́рая предста́тельница;
ра́дуйся, терпе́щих лишéния утéшительнице.

Ра́дуйся, честна́го супру́жества охранéние;
ра́дуйся, всех во враждé сущих умирéние.

Ра́дуйся, неправо на суд влеко́мых
защитительнице;

ра́дуйся, и о ви́новных пред судомъ земнымъ к
Бо́гу ми́лостивая ходатаице.

Ра́дуйся, лиш́ившихся кро́ва пристáнище;
ра́дуйся, всех к тебе́ взыва́ющих заступнице.

Ра́дуйся, праведная ма́ти Матро́но,
те́плая о нас к Бо́гу моли́твеннице.

Конда́к 11

Пе́ние а́нгельское слы́шала еси́, ма́ти честна́я
Матро́но, ещé на земли́ живу́щи. Научи́ и нас,
недостойных, ка́ко подобáет сла́вити Бо́га, в
Тро́ице почита́емаго, Отца́ и Сы́на и Свята́го
Ду́ха, Ему́же непреста́нно во́инства небéсная
велегла́сно воспева́ют: Аллилу́ия.

И́кос 11

Светоза́рным све́том сия́ет жити́е твоё,
блаже́нная Матро́но, освеща́я мрак
многосу́етнаго ми́ра сегó, и влече́т к себё ду́ши
на́ша, я́ко да и мы луче́ю благода́ти Бо́жия
озари́мся и ско́рбный путь привре́менных жи́зни
богоу́годно пройдем и Ца́рствия Бо́жия
достигнем, иде́же ты, ма́ти, ны́не всели́лася еси́,
слы́шащи глас наш, тебе́ зову́щих:

Ра́дуйся, свеще́ Бо́жия, при́сно горя́щая;

ра́дуйся, бисере́ честный, блиста́нием святы́ни
твоея́ нас оза́ряяй.

Ра́дуйся, цве́те благово́нный, Ду́хом Святы́м нас
облагоуха́яй;

ра́дуйся, ка́меню ве́ры, малоду́шныя в
благоче́стии утвержда́яй.

Ра́дуйся, звездó пресве́тлая, пра́вый путь нам
указу́ющая;

ра́дуйся, до́брая воительнице́ Христо́ва, мечём
моли́твы де́монския полки́ устраша́ющая.

Ра́дуйся, я́ко все жити́е твоё свя́то и непоро́чно;

ра́дуйся, я́ко и смерть твоя́ пред Го́сподем
честна́.

Ра́дуйся, пра́ведная ма́ти Матро́но,
те́плая о нас к Бо́гу моли́твеннице.

Конда́к 12

Благода́ть Бо́жию оби́льно е́ще от пелён
восприя́ла еси́, ма́ти блаже́нная, я́же вы́ну
пребы́ть с тобо́ю по вся дни жи́зни. Ве́руем
несумне́нно, я́ко и по успе́нии твоём благода́ть
сия пребога́тно пребы́вает с тобо́ю. Сего́ ра́ди
припа́дающе мо́лимся: не лиш́и и нас, е́ще
странству́ющих на земл́и, по́мощи твоея́ и
заступле́ния, прося́щи Го́спода поми́ловати всех
пою́щих Ему́: Аллилу́ия.

И́кос 12

Пою́ще мно́гая и дивна́я твоя́ чуде́са, ма́ти
Матро́но, восхваля́ем Бо́га, дарова́вшего гра́ду
Москве́ и Оте́честву на́шему во дни безбо́жия и
гонения́ тя, непоколеб́имый столп благоче́стия и
ве́ры. Ны́не же, блаже́нная ма́ти, благодарным
се́рдцем воспева́ем тебе́ си́це:

Ра́дуйся, мир Христо́в в душе́ твоёй стяжа́вшая;
ра́дуйся, сего́ ра́ди мно́гия лю́ди о́крест тебе́ к
Бо́гу приве́дшая.

Ра́дуйся, в немо́щнѣм тѣлѣ сѹщи, си́лу Бо́жия
благодáти показáвшая;

ра́дуйся, во обрѣтении честнѣх мо́щей твои́х
Бо́жию ми́лость нам явѣвшая.

Ра́дуйся, со́нма святѣх Моско́вских изрядное
процветѣние;

ра́дуйся, гра́да Москвѣ́ пресла́вное украше́ние.

Ра́дуйся, Оте́чества на́шего прѣсна́я пред Бо́гом
печа́льнице;

ра́дуйся, к пока́йнию и моли́тве о земли́
Росси́йстей всех призывáющая.

Ра́дуйся, пра́ведная ма́ти Матро́но,
те́плая о нас к Бо́гу моли́твеннице.

Конда́к 13

О блаже́нная ма́ти, услы́ши ны́не воспева́емое
тебе́ хвале́бное пѣние и испроси́ нам у Го́спода
Иисѹса Христа́ грехо́в оставле́ние, христиа́нския
ми́рныя кончи́ны и до́браго отве́та на Стра́шнем
Суди́щи Его́, да и мы с тобо́ю сподо́бимся в
селѣниях ра́йских сла́вити Святу́ю Тро́ицу,
вопию́ще: Аллилу́ия.

Сей конда́к глаго́лется три́жды.

И па́ки чтётся 1-й и́кос и 1-й конда́к

Моли́тва

О, блаже́нная ма́ти Матро́но, душе́ю на Небеси́ пред Престо́лом Бо́жиим предстоя́щая, те́лом же на землі́ почива́ющая и да́нною ти свы́ше благода́тию различна́я чудеса́ источа́ющая! Призри ны́не ми́лостивным твои́м о́ком на ны, грешны́я, в ско́рбех, боле́знях и бесо́вских искуше́ниях дни своя́ иждива́ющая, утэ́ши ны, отчая́нныя, исцели́ недуги́ наша́ лю́тыя, от Бо́га нам по грехо́м наши́м попу́щае́мая, изба́ви нас от мно́гих бед и обстоя́ний, умоли́ Го́спода нашего́ Иису́са Христа́ прости́ти нам вся́ наша́ согреше́ния, беззако́ния и грехопаде́ния, и́миже мы от ю́ности наше́я да́же до настоя́щаго дне и часа́ согреси́хом, да твои́ми моли́твами получи́вше благода́ть и ве́лию ми́лость, просла́вим в Тро́ице Еди́наго Бо́га, Отца́ и Сы́на и Свята́го Ду́ха, ны́не и при́сно и во ве́ки веко́в. Ами́нь.

